

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. 18मीं लोकसभा दा पैह्ला इजलास कल्लै थमां शुरू होआ'रदा ऐ।
2. श्री अमरनाथे दी यात्रा कोला पैहले उपराज्यपाल मनोज सिन्हा होरें जम्मू प्रांतै दे जिला विकास कमीशनरें ते एसएसपीएं कन्नै बैठक लाइयै सुरक्षा ते जिला विकास दी स्थिति दा जायजा लैता।
3. उड़ी सेक्टर च नियंत्रण रेखा पर सुरक्षा बलें घुसपैठ दी इक बड्डी कोश्ट गी नकाम कीता ऐ ते 2 आतंकवादिएं दे मारे जाने दी जानकारी ऐ।
4. आईसीसी टी-20 दे इक मैच च बंगलादेश गी हराइयै भारत सैमीफाइनल दे कदम होर नेड़े पुज्जी गेआ ऐ।

<><><><><><>

Parliament Session

18मीं लोकसभा दा पैह्ला इजलास कल्लै थमां शुरू होआ'रदा ऐ। इस दरान नमें चुने गेदे सांसदें गी सगंध दोआई जाग। वरिष्ठ बीजेपी सांसद भर्तृहरि महताब लोकसभा दे नमें सांसदें गी सगंध दोआगन। महताब होरें गी अस्थाई अध्यक्ष बनाया गेआ ऐ। नमें लोकसभा अध्यक्ष दा चुनां इस म्हीने दी 26 तरीक गी होग। अगले दिन यानि 27 जून गी राश्टपति द्रौपदी मुर्मू होर लोकसभा ते राज्यसभा दे सांझे इजलास गी संबोधत करगन। राज्यसभा दा इजलास 27 जून गी शुरू होग। संसद दा एह सत्र अगले म्हीने दी 3 तरीक गी सम्पन्न होई जाग।

<><><><><><>

Baramulla MP-NIA

नमीं दिल्ली दी पटियाला हाउस अदालतै जम्मू कश्मीर दी बारामुला सीट थमां नमें चुनोए दे सांसद इंजीनियर रशीद दी जमानत याचिका खलाफ जवाब दाखल करने आस्तै राश्ट्रीय जांच अर्जेसी गी समां दित्ता ऐ। बारामुला थमां सांसद इसलै अर्जेसी दी हिरासत च न ते सांसद दे तौर पर सगंध लैने आस्तै अंतरिम जमानत

जां हिरासत पैरोल दी मंग करा'रदे न। एनआईए नै दस्सेआ ऐ जे याचिका पर संसद अधिकारिएं ते जेल अधिकारिएं कन्नै सोच बचार कीता जा'रदा ऐ। न्यायधीश किरण गुप्ता होरें मामले पर जवाब ते सुनवाई आस्तै पैहली जुलाई दी तरीक तैह कीती ऐ।

<><><><><><>

LG Security

उपराज्यपाल मनोज सिन्हा होरें जम्मू च उच्च सतह दी सुरक्षा ते जिले स्हाबे विकास कम्में दी इक बैठक दरान समीक्षा कीती। बैठक च खित्ते दे 10 जिले दे डिप्टी कमीशनरें ते एसएसपीएं सनें सिविल ते पुलस प्रशासन दे वरिष्ठ अधिकारिएं हिस्सा लैता। उपराज्यपाल होरें खित्ते दी पूरी पराती सुरक्षा बवस्था दा जायजा लैता। उनें आतंकवाद दे पूरे पराते तंत्र गी खत्म करने आस्तै सुरक्षा बलें, सिविल ते पुलस प्रशासन बश्कार नेडमे तालमेल पर जोर पाया। उनें आखेआ जे आतंकवादिएं दा सफाया कीता जाना लोडचदा ते उनें लोकें गी जेहड़े इनेंगी रपेया पैसा, साजो-समेयान उपलब्ध करोआ'रदे न जां पही ओह जेहड़े इंदा समर्थन करा'रदे न, पैहल दी बिनाह पर सख्ती नै निबड़ेआ जाना लोडचदा। उपराज्यपाल होरें विकास परियोजनाएं ते समाज कल्याण ते होरने दुइएं स्कीमें दी अमलावरी ते इंदे तैहत हासल उपलब्धिएं दा बी जायजा लैता। बैठक दरान श्री अमरनाथ जी दी यात्रा ते यात्रा दरान महत्वै आले पैहलु जियां सुरक्षा, यातायात प्रबंधन, रस्ते च श्रद्दालुएं लेई लाडचदी सुविधा, शिडकें गी ठीक करना, आरएआईडी कार्ड दी बंड बगैरा दा जायजा लैता।

<><><><><><>

CS Yatri Niwas

मुख्य सचिव अटल डुल्लू होरें कल यात्री निवास भगवती नगर दा दौरा लाया ते श्री अमरनाथ जी दी यात्रा लेई तैआरिएं दा जायजा लैता। एह सलाना यात्रा 29 जून गी शुरू होआ'रदी ऐ। अपने दौरे दरान मुख्य सचिव होरें जिला प्रशासन ते होर दुए सरबंधी मैहकमे दे वरिष्ठ अधिकारिएं कन्नै बैठक लाई। उनें बक्ख-बक्ख मैहकमें दे प्रमुखें गी यात्रा गी सुचारू ते सफलतापूर्वक करोआने लेई अगेत्रे सारे लोडचदे इंतजाम करने दियां हिदायतां दित्तियां। उनें शिविर च साफ सफाई ते स्वच्छता बनाई रखने लेई बी आखेआ। मुख्य सचिव होरें आखेआ जे श्री अमरनाथ जी दी यात्रा दी धार्मिक स्हाबे बड़ी मती महत्ता ऐ ते एह साढी जिम्मेदारी ऐ जे अस यात्रा पर औने आले रद्दालुएं गी सुरक्षत ते बेहतर माहौल उपलब्ध करोआचै। उनें सब्बने सरबंधी घडें गी आखेआ जे ओह आपूं चै नेडमा तालमेल बनाइयै कम्म करन ते यात्रिएं गी हर संभव सहायता उपलब्ध करोआन।

<><><><><><>

Muslim League Ban

गैर कनूनी गतिविधिएं दी रोकथाम सरबंधी कनून यूएपीए तैहत् कायम पीठ नै मुस्लिम लीग जम्मू कश्मीर मसरत आलम गुट ते तहरीक-ए-हुर्रियत, जम्मू ते कश्मीर पर 5 ब'रें लेई प्रतिबंध लाने दे केन्द्र दे फ़ैसले दी तस्दीक कीती। दिल्ली हाई कोर्ट दे न्यायधीश सचिन दत्ता होर एहदे इकलोते सदस्य हे। उनेंगी इनें गुटें पर रोक लाने दी लोड़चदी वजहें दा आंकलन करना हा। हाई कोर्ट दे जज हुंदी अगुवाई आली ट्रिब्यूनल नै आखेआ जे इस रोक गी लाने दी पच्छोकड़े च केई सारे कारण न। केन्द्र शासत प्रदेश च राष्ट्र विरोधी गतिविधिएं च शामिल होने करी दौनें गुटें गी 5 ब'रे लेई गैर कनूनी घोषत करी दित्ता हा। ट्रिब्यूनल नै एह बी तस्दीक कीती जे एह गुट पाकिस्तान अधारित आतंकवादी संगठनें जियां लश्करे तैयबा ते हिजबुल मुजाहीदीन लेई कम्म करा'रदा ऐ।

<><><><><><>

Uri Infiltration

उत्तरी कश्मीर दे बारामुला जिले च नियंत्रण रेखा पर कल फौज नै बन्ने पारा घुसपैठ दी इक कोश्ट गी नकाम करदे होई दऊं आतंकवादिएं गी मारी मकाया ऐ। एह टाकरा उसलै छिड़ेआ जिसलै बजरंग उड़ी सेक्टर च घुसपैठ करने आले किश आतंकवादिएं दी मजूदगी बारे इक टकोहदी सूह थोने पर सुरक्षाबलें इलाके च तुपाई अभियान शुरू कीता। जानकारी दरान इस दरान उत्थें छप्पे दे आतंकवादिएं सुरक्षाबलें पर गोलीबारी शुरू करी दित्ती। फौज दी चिनार कोर नै अपनी इक सोशल मीडिया पोस्ट च आखेआ जे घुसपैठ बारे जानकारी थोने पर उड़ी सेक्टर च घुसपैठ रोधी अभियान चलाया गेआ ते कारवाई अजें जारी ऐ। जिसलै जे इक अधिकारी दा आखना ऐ जे कारवाई दरान दऊं आतंकवादिएं दे मारे जाने दी जानकारी ऐ, पर अजें उंदियां लोथां बरामद नेई कीतियां गेदियां न। उत्तरी कश्मीर च पिछले इक हफते दरान एह त्रीह आतंकी घटना ऐ। 19 जून गी बारामुला जिले दे रफियाबाद इलाके च लश्करे तैयबा दे दऊं आतंकवादी मारे गे हे ते ओहदे शा पैहले 17 जून गी बांडीपोरा दे अरागाम इलाके च सुरक्षा बलें इक टाकरे दरान इक मकामी आतंकवादी गी मारी मकाया हा।

<><><><><><>

GST Council

माल समेयान ते सेवाएं सरबंधी टैक्स जीएसटी दी काउंसल नै स्टील, फौलाद ते अलमी नियम दे बने दे दुधै दे कैनें पर इक बरोबर 12 प्रतिशत जीएसटी लाने दी सफारश कीती ऐ। कल लग्गी दी जीएसटी काउंसल दी बैठक दे बाद मीडिया कन्नै गल्लबात करदे होई केन्द्री खजाना मंत्री निर्मला सीतारमण होरें घोषणा कीती जे रेलवे आस्सेआ आम लोकें गी उपलब्ध कराई जाने आलिणं सेवाएं जिंदे च प्लेट फार्म टिकटें दी बिक्री, अराम करने ते डीकने लेई थाहरें दी सुविधा, बैटरी कार सेवा बगैरा शामिल ऐ, उंदे पर कोइ जीएसटी नेइं लाई जाग। उनें आखेआ जे हिमाचल प्रदेश ते जम्मू कश्मीर दे सेअऊ उत्पादकें गी ध्यानै च रखदे होई काउंसल नै सेअऊ पैक करने आले डब्बें पर शड़ी 12 प्रतिशत जीएसटी लाने दी सफारश कीती ऐ।

<><><><><><><><>

NEET Examination

अज्ज होने आला नीट-पीजी मतेयान स्थगित करी दित्ता गेआ ऐ। मतेयान दी नमीं तरीक दी घोषणा तौले गै कीती जाग। सेहत मंत्रालय नै दस्सेआ ऐ जे एह फैसला किश मकाबलेबाजी आले मतेयान च कथित तौर पर अनियमिताएं दे हाल दे अरोपें दे मगरा लैता गेआ ऐ। मंत्रालय नै आखेआ ऐ जे एह फैसला विद्यार्थिं दे हित च ते मतेयान प्रक्रिया दी विश्वसनीयता गी बनाई रखने लेई लैता गेआ ऐ। मंत्रालय नै कथित अनियमिताएं ते गड़बड़ी आले अरोपें दे चलदे मामले गी सीबीआई गी सौंपेआ ऐ। जारी इक ब्यानै च मंत्रालय नै आखेआ जे सरकार विद्यार्थिं दे हित ते मतेयान प्रति भरोसे गी बनाई रखने लेई वचनबद्ध ऐ। मंत्रालय दा गलाना ऐ जे कोई बी व्यक्ति जां संगठन जेहड़ा इसदे च शामिल होग, गी बख्शेआ नेई जाग ते ओहदे खलाफ सख्त कारवाई कीती जाग।

<><><><><><><><>

Restrictions Exams

रामबन जिले च अज्ज लैते जाने आले समाज कल्याण मैहकमे च सुपरवाइजर दिएं असामिं लेई मतेयान लेई बनाए गेदे केन्द्रें दे 200 मीटर दे दायरे च बंदशां लागू करी दित्तियां गेदियां न। जिला मैजिस्ट्रेट हुंदे आस्सेआ जारी हुकमै मूजब शड़ा मतेयान देने आले मेदवारें गी गै मतेयान केन्द्रें च दाखल होने दी इजाजत दित्ती जाग। ओब्बी अपना प्रिंट कीते दा एडमिट कार्ड दस्सने पर। एहदे इलावा मतेयान लैने आले सुपरिटेण्डेंट, निगरान स्टाफ, इनविजिलेटर, मैजिस्ट्रेट, कोआडीनेटर ते इस प्रक्रिया दी वरडियो बनाने लेई इख्तेयार हासल वीडियो ग्राफरें दे कन्नोकन्नी मतेयान लैने च सैहयोग देने आले, अमले गी बी उत्थें जाने दी इजाजत होग। एहदे इलावा होर कुसै गी बीमतेयान केन्द्रें दे 200 मीटर दे दायरे अंदर जाने दी खुल्ल नेई होग।

<><><><><><><><>

T-20 World Cup

मर्दे दे आईसीसी टी-20 विश्व कप दे इक मकाबले च कल भारत नै बंग्लादेश गी 50 रंज कन्नै हराइयै अपना दबदबा जारी रखेआ। जंदी रातीं अटीगुआ दे सर विवियन रिचर्डस स्टेडियम च खेड्डे गेदे इस मैच च बंग्लादेश नै टॉस जित्तिथै भारत गी बल्लेबाजी करने लेई आखेआ। भारत नै 20एं ओवरें च 5 विकेटां मोआइयै 196 रंज बनाए। जित्त लेई लोड्डे 197 रंज दे लक्ष्य दा पिच्छा करदे होई बंग्लादेश दी टीम पूरे 20 ओवर खेड्डियै 8एं विकेटें दे नुक्सान पर 146 रंज गै बनाई सकी। इस जित्त दे कन्नै गै भारत टी-20 विश्व कप दे सैमीफाइनल दे इक कदम होर नेडे पुज्जी गेआ ऐ। अफगानिस्तान ते आस्ट्रेलिया बश्कार एल्ले जारी मैच जेहदे

च अफगानिस्तान नै आस्ट्रेलिया अगुँ जित्त लेई 149 रंज दा लक्ष्य रखे दा ऐ, च जेकर आस्ट्रेलिया जित्ती जंदा ऐ तां भारत सैमीफाइनल लेई क्वालीफाई करी लैग। तोआई बंगलादेश कल दी हार दे बाद टूर्नामेंट चा बाहर होई गेआ ऐ।

<><><><><><>